

# 1 TESALONIKA

## Tesalonika mbal tuku waŋe

## Paulusŋe amboŋga kuyarna

Paulus nu Korinŋe minmba Tesalonika mbal tuku waŋe te kuyarna ta tugunu tejenmba. Zu afu nane Kuate tuku kuasmbi Tesalonikanje minnaig ta piti serninginaig le Paulusŋe nane piti ŋamukŋe bike ndaka saŋgri tiŋguwaig ŋga nane tuku waŋe te kuyarna.

**1** Tane Mam Kuate, Sunŋo Yesus Kristus nale tuku mbal Tesalonikanje minig tane ŋakmba kaiye. Ye Paulus Silvanus le Timoteus sine tane ndoŋ pasa-pasakam proweg. Kuate nu tane ake sinaŋ make patika ŋgamuŋgal wamduš bul sertiŋguwa. Son.

### *Tesalonika mbal tuku ŋgamuŋgal son saŋgrinu*

**2** Sine mara mara tane idustiŋmba Kuate gare pasa tuweg. Sine yabaneg ait mbolŋe tane tuku nyu turmba te-mayokek. **3** Tane taŋgine ŋgamuŋgal son alonu kile-mayokka taŋgine kume pur maŋaumbi afu turkam tuku matuk tukulka Sunŋo Yesus minde minig ta saŋgri tiŋgade.

**4** O tira kame, Kuate nu tane tuku kume purna sulumba tane maditiŋmba kilna ta sine kila. **5** Sine o buk tane tugumŋe Kristus tuku pasa mayenu kukligeŋ le Tukul Guwa tuku saŋgrimbi pasa ta mayok ka tane tuku ŋgamuŋgal nduasekina le tane son ŋginaig. Sine pasa kukligeŋ mbal tane ŋamukŋe mingen le sine tuku maŋau ta tane kila

pilnaig. <sup>6</sup> Tane pasa mayenu ismba dubimba piti sunjomba kañgerkinaig ta Tukul Guwa tane turka sinzañtingina le tane wamduš bulkinaig. Tañamba tane Sunjo tuku mañau sine tuku mañau ndui ta dubinaig.

<sup>7</sup> Tañgine mañau mayenu tanje Yesus son ḥgade mbal Masedonia le Akaia ma tugu mbolŋe mine likade ta nane Yesus dubi mayewam tuku ndin tumningina. <sup>8</sup> Tane mbolŋe Sunjo tuku pasa Masedonia le Akaia ma tugu mbol ndo kine ndakina. Tane Kuate tuku sangri tomba tiŋgade mañau ta kilke mbol mbal ḥakmba isnaig. Ta tuku sine afu saniŋgam tuku mine ndakade. <sup>9</sup> Kuga. Nane ḥakmba sine tugum pro tejenmba tane tuku sakade le iseg. Sine tane Tesalonika mbal tugumŋe pasa kukligen le tane ismba Mbara tugusek abo tugu ḥak nu kumnemijge minam saka ḥgamunŋal biye mbilmba tañgine yabri mbara ḥakmba kusreka Kuate ndo dubide. <sup>10</sup> Kile tane nu tuku Kiŋo samba mbolŋe ndekam tuku tairŋga minig ta pro sakade le iseg. Kuate tuku Kiŋo ta Yesus. Nu kumna le Kuatenŋe nu te-tina le nu abonŋa tiŋgina. Kuate nu pro pilesiŋgam tuku pa ta laipsiŋgam tuku Yesus nu muskil kile-tidiŋge siŋgit.

## 2

### *Paulus nu Tesalonika mbal ḥgamukŋe pirokina*

<sup>1</sup> O tira kame, sine tane tugumŋe pirokigen ta ake piro ndakigen. Alonu tane mbolŋe mayok kina ta tane kila. <sup>2</sup> Sine tane tugum pro ndambra Filipinŋe pirokigen ta afunŋe rar sunjo siŋmba kiiko pilesiŋginaig. Sine tane tugum promba afu sine

ŋgueu patikinaig ta Kuate nu sine saŋgri pilesingina le sine saŋgri tiŋga nu tuku pasa mayenu kuklimba satiŋgigeŋ.

<sup>3</sup> Sine tane pasa ismba son ŋgap ŋga pasa kukliweg te mbar wamduš ko kutur wamduš dubimba pasa kukli ndaweg. Ko tane yabritiŋgam tuku pasa ta sa ndakeg. <sup>4</sup> Kuga. Kuate nu abo abo sine tuku maŋau kaŋgerna sulumba nuŋe pasa mayenu kukliwam tuku piro te sine tuku wai mbolŋe pilna. Ta tuku pasa mayenu kukliweg te taŋgoŋe sine nzalisiŋgam tuku kukli ndaweg. Kuate nu sine tuku ŋgamunjal pileŋgate ta nu nzaliwa ŋga pasa kukliweg. <sup>5</sup> Sine tane tugumŋe ŋule parak pasa sa ndakigen ta tane kila. Ko tane tuku agan ndende kilam tuku piririmba yabri pasa sa ndatiŋgen ta Kuate nu kila. <sup>6</sup> Sine Kristus tuku aposel nyu tigeŋ ta nyu tambi sine tane tuku wamduš didi ndakigen. Tane Tesalonika mbal ko mbal afu kise sine tuku nyu payamkam tuku sine idus ndaweg.

<sup>7</sup> Ina ande nuŋe kiŋo kame kulatkate taŋamba ndo sine tane ŋgamukŋe wamduš bafukmbi tane kulatkigen. <sup>8</sup> Sine tane tuku wamduš suŋgo pilgen sulumba Kuate tuku pasa ndo sanu tuku idus ndageŋ. Sine siŋgine wamduš ŋakmba kilemayokka tane tumtiŋgam tuku idusgeŋ.

<sup>9</sup> O tira kame, sine tane ŋgamukŋe Kuate tuku pasa mayenu kuklimba mingen sulumba sine tane piti tiŋbekig ŋga sine furir ki mindek siŋgine miroŋ ŋgaro turam tuku piro karenka matuk tukulkigen ta tane kila. <sup>10</sup> Sine maŋau tiŋreknu mbar kugatok tane Yesus son ŋgade mbal tugumŋe mayok kagen ta tane ŋakmba kila. Ku-

ate nu mata kila. <sup>11-12</sup> Tane Kuate tuku gageu mayok ka nuje kilja tugum prowam tuku nu tane wikate. Nu tane wikate ta taŋgine mine mbolŋe kumumba te-mayokap ɳga taŋgo kame naŋgine kiŋo kame mbolŋe maŋau kade taŋamba sine tane mbolŋe kigenj. Sine tane sarsartimba wamduš saŋgri piletimba rirona pasa tiŋgigeŋ.

<sup>13</sup> Sine tane tugumŋe Kuate tuku pasa kukligeŋ ta tane pasa ta ismba taŋgo tuku pasa taŋaŋ ise ndakinaig. Tane kumumbi idusmba Kuate tuku pasa ɳga tinaig. Tane Kuate son ɳgade mbał pasa ta tuku saŋgri tane sinamŋe pirokate. Wam ta tuku sine mara mara Kuate gare pasa tuweg.

<sup>14</sup> O tira kame, Yesus Kristus ndoŋ ulendikade mbał Kuate tuku kuasmbi Yudea ma tugu mbolŋe mine likade ta tane nane taŋaŋ mayok kinaig. Zu mbał afu naŋgine mbał piti ninginaig taŋamba ndo taŋgine mbał afunge tane mata piti tiŋginaig. <sup>15</sup> Zu mbał nane Kuate tuku tuan taŋgo bale farniŋmba siŋgine Sunjo Yesus mata balenaig. Taŋamba nane sine mata pitaikinaig. Nane siŋka Kuate gare tuwe ndakade. Nane taŋgo ɳakmba tuku ɳgueu minig. <sup>16</sup> Sine tane kasomok mbał pasa mayenu satiŋgeŋ le Kuate nu tane tuku muskil kile-tidiŋge tiŋgit maŋau ta sine kusrebe ɳga Zu mbał nane sine peusiŋgam dirnaŋgade. Taŋade le naŋgine mbar sugo ke likinaig ta kumunŋgam bafute le nane Kuate tuku pa ɳayonu kaŋgeramŋaig.

*Paulus nu Tesalonika mbał maŋ kaŋgerkam idusna*

<sup>17</sup> O tira kame, sine ait fagnu mbolŋe muŋgu kusrekigeŋ ta siŋka ɳgamuŋgalmbi kuga. Ngarosu

ndo munju kusrekigeñ. Sine mañ tane tumail kañgernu tuku wamduñ sañgrinu pilmba ndin sota wamduñ sungo njak mingeñ. <sup>18</sup> Ye Paulus sine mañ tane tugum prowam tuku ndin sota minen ta Satan nu sine tuku ndin tukulna.

<sup>19</sup> Singine Sungo Yesus nu prowa le sine nu tugumäge tiñgamäge ta sine tane mboläge ndo tumail puluka gare sungo tumba payamkamäge. <sup>20</sup> Singine nyu te-mayokmba gare-garekam tuku agan̄ ta tane ndo.

### 3

#### *Paulus nu nane kañgernu tuku Timoteus kukulna*

<sup>1</sup> Sine tane kañgernu tuku wamduñ sungo ta kume seram kumuñ kuga tukunu sikile ndo Silas ndon̄ Atensäge minbe ñga <sup>2</sup> sikile tira Timoteus kukulkeñ le tane tugum prona. Nu Kuate tuku piro tanjo minmba Kristus tuku pasa mayenu kuklite. Nunje tane tuku ñgamunjal son sañgri piletinjmañba tane ñgamunjal wamduñ bul sertingam tuku nu kukulkeñ. <sup>3</sup> Tane piti ñgamukäge minig ta wamduñ bike ndaka sañgri tingap ñga iduskeñ. Sine Kristus tuku mbal piti tanjañ kañgerkam tuku mineg ta tane kila. <sup>4</sup> Sine buk tane ndon̄ mingeñ sulumba sine Kristus tuku mbal piti kañgerkamäge ñga satingigeñ. Pasa satingigeñ ta kile alonu kañgerde. <sup>5</sup> Tane piti afu kañgerkade ta ye ismba tane kañgerkam tuku wamduñ kume sere fugumba tane tuku ñgamunjal son isam tuku Timoteus kukulen le tane tugum kina. Satan nu tane tagotinjuwa le ndekap le sine tane tugumäge

piro karenkigenj ta alo kugatok ɳgubekig ɳga ye nu kukulen.

<sup>6</sup> Kile Timoteus nu tane kusreka sile tugum te promba taŋgine ɳgamuŋgal son bike ndaka taŋgine kume pur maŋau saŋgrinu minit ta kubete le isek. Tane sile tuku wamduš mayenu ɳak minig le sile tane kaŋgerkam tuku wamduš sun̄go pilek taŋamba ndo tane mata sile kaŋgernu tuku wamduš sun̄go pilig.

<sup>7</sup> O tira kame, sile piti sun̄go sinamanzer ɳak minmba tane tuku ɳgamuŋgal son tuku maŋau isek le wamduš bul sersikit. <sup>8</sup> Tane Sun̄go kusre ndamba nu dubi mayede tukunu sile piti te sinamnje gare tumba saŋgri tek. <sup>9</sup> Sine tane idustiŋmba Kuate tuku am mbolŋe gare teg wam taŋge marosiŋgit le sine tane tuku ɳga Kuate tuku nyu te-dun̄geg. <sup>10</sup> Ki furir mindek sine tane kaŋgernu tuku wamduš ndindo ɳak minmba Kuate yabaŋmba mineg. Sine tane tugum promba tane tuku ɳgamuŋgal son wam afu denkade ta tumtiŋgam tuku idusmba mineg.

<sup>11</sup> Mam Kuate siŋgine Sun̄go Yesus nale ndin inum tumsiŋguwaik le sine tane tugum prowam tuku idusmba yabaŋeg. <sup>12</sup> Sun̄go nu tane tuku kume pur maŋau saŋgri pilewa le sine tane tuku lato lato kume purmba mineg taŋamba ndo tane mata taŋgine tira kame, taŋgo ɳakmba tuku lato lato kume purkap ɳga yabaŋeg. <sup>13</sup> Tane taŋawap ta Sun̄go nu tane tuku ɳgamuŋgal saŋgri piletiaŋmba minwa le ma ma siŋgine Sun̄go Yesus nu nuje mbal ndon̄ prowa le tane Mam Kuate tugumnje mbar kugatok purfeŋnu tiŋgamnjaig. Son.

## 4

*Sine manjau purfeñnu ɻak minbe*

<sup>1</sup> O tira kame, sine Sungo Yesus tuku nyu mbolŋe tane wam ande kam tuku sarsartiŋgamŋig. Sine o buk tane ndon minmba mine manjau Kuate nzalite ta tumtiŋgigeŋ le tane kila pilmba kile taŋamba minig. Tane mine manjau ta lato lato kumba minap ɻga satiŋgeg. <sup>2</sup> Sine Sungo Yesus tuku nyu mbolŋe tane wam pagu pasa satiŋgigeŋ ta tane kila. <sup>3</sup> Tane purfeñnu minap ta Kuate tuku nzali. Tane fare fare taŋgo pino ndon une ndaka <sup>4</sup> manjau tiŋreknumbi pino kilap. <sup>5</sup> Nane Kuate gilai mbal naŋgine ɻgarosu tuku nzali mbolŋe pino fare fare kilig taŋamba ke ndakap.

<sup>6</sup> Tane taŋgine tira ande lukamba nu tuku pino didika nale muŋgu kilik wam ta pur ndanikap. Nane taŋamba kade mbal ta Sungo nu lafunu ningamŋat. Sine riron pasa ta buk satiŋgigeŋ le tane isnaig. <sup>7</sup> Kuate nu sine wikina ta kutur ɻak minbe ɻga wi ndakina. Nu sine purfeñnu minbe ɻga wikina. <sup>8</sup> Ande nu wam pagu pasa te pitaikate ta nu taŋgo tuku miŋge pitai ndate. Nu Kuate Tukul Guwa siŋgit nu tuku miŋge pitaite.

<sup>9</sup> Tane taŋgine taŋgine kume purkam tuku Kuatenje tumtiŋgina. Ta tuku ye tane manjau ta kap ɻga kuyar ndawet. <sup>10</sup> Tira kame Masedonia ma tugu mbolŋe mine likade ta tane nane ɻakmba tuku kume purkade. Taŋgine manjau mayenu ta ndo lato lato kap.

**11** Tane ɳgan mine maŋau mbolŋe minam tuku wamduš saŋgrinu palpe. Taŋgine wam ndo idus-niŋmba afu tuku wam kuer ndakap. Tane ake mine ndaka waimbi pirokap. Sine buk taŋamba tane wam pagutiŋgigen. **12** Tane taŋamba pirokap ta Yesus dubi ndade mbal tane kaŋgerka tane tuku saka minamŋgaig. Maŋau ta mbolŋe taŋgine ɳgarosu kulatka afu pití serniŋge nda.

### *Suŋgo nu luka prowamŋgat*

**13** O tira kame, tane kumig mbal tuku wamduš mbarbekaig ɳga sine tane kila satiŋgamŋgig. Mbal afu Yesus ndoŋ minam tuku idus ndamba naŋgine kumig mbal ta tuku malmbika pití suŋgo tade. Tane tangine kumig mbal tuku malmbi suŋgo ndawap. **14** Yesus nu kummiba aboŋgina ta sine son ɳgég. Taŋamba ndo Yesus son ɳga kumig mbal nane Kuatenje kile-tidiŋguwa le Yesus ndoŋ prowamŋgaig ta sine mata son ɳgég.

**15** Sine kile pasa satiŋgamŋgig te Suŋgo tuku pasa. Suŋgo nu prowa le sine kilke te mbolŋe abo ɳjak mineg mbal kumanu mbal kile-ɳgumnemke nda. Kuga. **16** Wi saŋgri mayok kuwa le eŋel kame tuku gabat nu wikuwa le Kuate tuku tabil fudukuwa le Suŋgo nu samba mbolŋe ndekamŋgat. Ndekuwa le nane Kristus son ɳga kumig mbal amboŋga tiŋgamŋgaig. **17** Nane tanjawaig le kilke te mbolŋe son ɳga mineg mbal sine ɳjakmba kilmba kile-dunŋguwa le gau mbol ambenje kumig mbal ndoŋ ulendika kumba Yesus tugumŋge maŋgurkamŋgig. Taŋabe sulumba sine Suŋgo ndoŋ mara mindek minmba minamŋgig.

**18** Tane pasa tembi taŋgine taŋgine wamdus piti kile-ibenŋkap.

## 5

### *Yesus prowam tuku ait mambilmba minap*

**1** O tira kame, Sungo nu ginu ait mbolŋge prowamŋgat ye ta tuku kuyar ndawet. **2** Sungo tuku ait kuayar taŋgo nu pitik furir prote taŋaŋ mayok kaŋgat ta tane kila. **3** Taŋgo nane sine mine mayeweg ŋguwaig le Sungo nu pitik ndo prowa le kuma kuma nane mbolŋge prowamŋgat. Pino nu kiŋo te-palmbim ŋga pitik rar tate taŋaŋ nane mbolŋge prowamŋgat. Nane piti ta laipe nda.

**4** O tira kame, tane ma furir sinamŋge mine ndakade. Ait ta prowa le kuayar taŋgo prote le nane piriri ŋayode taŋamba tane piririwe nda.

**5** Sine ŋakmba bulu tuku kiŋo kame minmba ma make ko furir mine ndakeg. Sine mafen mineg.

**6** Ta tuku afu kinyanu taŋaŋ minig ta sine kinye ndakube. Sine wamdus kuyar mayenu ŋak mambilmba minbe.

**7** Kinyig mbal nane furir ait mbolŋge kinyig. Kule kamenu nyade mbal nane furir kule nyumba ŋginŋgankade. **8** Sine taŋamba kuga. Sine mafen mineg tukunu sine wamdus kuyar mayenu ŋak minmba kame taŋgo nuŋe ŋgaro kigraibkam tuku agaŋ patikade taŋamba patikube. Sine ŋgamunŋgal son kume pur maŋau kilmba tawo songam tuku agaŋ taŋaŋ silikube. Kuate nu sine tuku muskil kile-tidiŋge siŋgit alonu ta minde minmba hat karenŋnu taŋaŋ kaikube.

**9** Sine Kuate tuku gubra kaŋgeram tuku nu sine pati ndakina. Kuga. Sine Sunjo Yesus Kristus mbolŋe muskil kile-tidiŋgam tuku patikina. **10** Nu prowamŋat ta sine abo minbe le ko kumbe le sine nu ndoj minmba minam tuku nu sinenu ŋga kumna. **11** Ta tuku tane taŋgine taŋgine wamduš piti kile-ibenŋka muŋgu saŋgri piletiŋgig taŋamba ndo minmba minap.

### *Wam pagu pasayeki yeki*

**12** O tira kame, taŋgine gabat kame nane Sunjo tuku manjau tumtiŋmba tane kile-tidiŋgam tuku rironj pasa satiŋgig ta tane nane tuku nyu idusniŋmba kumnemŋge minap. **13** Nane Kuate tuku piro kade tukunu nane tuku kume purka nane tuku nyu idusniŋgap. Tane taŋgine taŋgine wamduš mukuk ŋak minap.

**14** O tira kame, taŋgine taŋgo afu ake kaloimba likade ta rironj pasa niŋgap. Afu wamduš piti ŋak ta taŋgine pasambi nane tuku piti kile-ibenŋkap. Nane afu ŋgamunŋgal son saŋgri kugatok ta sinzaŋniŋmba turkap. Taŋgo ŋakmba ŋgamukŋje gubra kugatok ŋgan minap. **15** Nane afu tane ŋaigo siglikuwaig ndeta manjau ndui tambi lafu ndawap. Taŋgine tira kame ko taŋgo ŋakmba mbolŋe wam magenu ke likam tuku wamduš saŋgrinu palpe.

**16** Tane mara mara gare ŋak minmba **17** Kuate yabaŋmba minap. **18** Tane mbolŋe wam afu prode ta tuku Kuate gare ndo tape. Tane Kristus Yesus tuku mbal taŋamba kam tuku Kuate nu nzalite.

**19** Tukul Guwa nu pa taŋan tane mbolŋe uge ŋak minit ta fu ndawap. **20** Nane afu Tukul Guwanje

pasa tumniŋgig le kile-mayokkade ta pasa ta talaka pitai ndawap. <sup>21-22</sup> Tane wam ɳakmba pileŋga wam ɳaigonu ɳgumneniŋmba wam magenu ta ndo biye dewap.

<sup>23</sup> Ngamuŋgal mukuk wam dus bulok maŋau Kuate nu tugu. Nuŋge tane tiŋreknu kile-mayokkuwa. Nu tane kulatka minwa le ma ma siŋgine Suŋgo Yesus Kristus prowa le taŋgine ɳgaro ɳgamuŋgal kanu ta ɳakmba mbar kugatok purfenju mayok kaŋgaig. Sine taŋamba tane tuku ɳga Kuate yabaŋeg. <sup>24</sup> Kuate nu tane wikate ta nu siŋka taŋamba kamŋgat.

<sup>25</sup> O tira kame, tane sine tuku yabaŋap. <sup>26</sup> Tane taŋgine taŋgine tira kame ndoŋ muŋgu kume purkade maŋau ta alonu te-mayokap.

<sup>27</sup> Ye Suŋgo tuku nyu mbolŋge pasa te satiŋget. Wanje te burkap le tira kame ɳakmba iswaig.

<sup>28</sup> Siŋgine Suŋgo Yesus Kristus nu tane ɳakmba make patikuwa.

Son.

**KUATE TUKU PASA  
Portions of the Old Testament and The New Testament  
in the Siroi Language of Papua New Guinea  
Sampela hap Buk Baibel long tokples Siroi long  
Niugini**

copyright © 1975, 1999 Wycliffe Bible Translators, Inc.

Language: Siroi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 11 Nov 2022 from source files dated 22 Nov 2019

9d2e8659-afb4-5cca-93d8-23ebf89e1709